

MINISTARSTVO UNUTRAŠNJIH POSLOVA

IZVJEŠTAJ O RADU MINISTARSTVA UNUTRAŠNJIH POSLOVA TUZLANSKOG KANTONA za 2001. godinu

Tuzla, februar 2002. godine

Ministarstvo unutrašnjih poslova Tuzlanskog kantona je u toku 2001. godine poslove i zadatke iz svoje nadležnosti izvršavalo u skladu sa zakonima koji regulišu oblast unutrašnjih poslova, Načelima i procedurama, Programom rada Skupštine Tuzlanskog kantona za 2001. godinu, Programom rada Vlade Tuzlanskog kantona za 2001. godinu i Programom rada Ministarstva za 2001. godinu.

Stanje materijalno-tehničke opremljenosti MUP-a TK nije na zadovoljavajućem nivou, što je posebno izraženo kroz nedovoljnu opremljenost policije savremenom policijskom opremom i sredstvima, vozilima, komunikacionom opremom i dr. Stanje telekomunikacione i informatičke opreme je na vrlo niskom nivou, dok informacionog sistema i baza podataka skoro da i nema. Izvršavanje planiranih poslova i zadataka iz djelokruga Ministarstva u toku 2001. godine nisu praćeni adekvatnom finansijskom podrškom. Prisutan je i problem nedostatka dovoljnog broja visokoobrazovanih stručnih kadrova. U toku 2001. godine za 169 zaposlenih izdata su rješenja o prestanku radnog odnosa, od čega sporazumnim raskidom - 121. Osim navedenog, Ministarstvo je suočeno i sa problemom nedostatka adekvatnog radnog prostora, zbog čega je prinuđeno da značajna finansijska sredstva izdvaja za zakup.

Imajući u vidu složenu bezbjednosnu situaciju i probleme sa kojima se u svom radu suočavalo, Ministarstvo unutrašnjih poslova Tuzlanskog kantona je, uz maksimalno angažovanje raspoloživih ljudskih i materijalnih potencijala, realizovalo planirane poslove i zadatke i ostvarilo značajne rezultate skoro po svim segmentima rada.

U toku 2001. godine, došlo je uspostavljanja pozicije Policijskog komesara, nakon čega je došlo do kadrovskih promjena u Upravi policije, koje imaju za cilj kadrovsko jačanje i depolitizaciju policije.

Stanje javnog reda i mira na području Tuzlanskog kantona u toku 2001. godine, pored složenosti bezbjednosne situacije i prisustva niza faktora koji je dodatno usložnjavaju, poboljšalo se u odnosu na prošlu godinu, kako po broju učinjenih prekršaja i broju učinilaca prekršaja, tako i sa aspekta posljedica tih prekršaja.

U oblasti javnog reda i mira evidentirano je 14,31% manje prekršaja nego u prošloj godini dok je broj učinilaca prekršaja manji za 14,24%.) Broj prekršaja po Zakonu o nabavci, držanju, nošenju i upotrebi oružja i municije manji je za 22,09% u odnosu na prošlu godinu.) Smanjen je broj teže povrijeđenih lica u prekršajima za 55,93% kao i broj lakše povrijeđenih lica u prekršajima za 6,20%, dok je broj smrtno stradalih lica ostao na nivou prošle godine. Na ovlaštene službenike policije izvršena su 33 napada, što je u odnosu na prošlu godinu više za 43,47%. U ovim napadima teže su povrijeđena 3 službenika policije dok ih je 15 lakše povrijeđeno. Protiv napadača na OSL-a podnešeno je 17 krivičnih prijava i 26 zahtjeva za pokretanje prekršajnog postupka.

Službenici policije MUP-a TK su 56 puta upotrijebili sredstva prinude-opravdano, dok je u jednom slučaju došlo do neopravdane upotrebe sredstava prinude. Broj opravdanih upotreba sredstava prinude u odnosu na isti period prošle godine veći je za 12%.

U protekloj godini posvećena je značajna pažnja narušavanjima javnog reda i mira nasiljem u porodici, nasiljem nad ženama i nasiljem nad maloljetnim licima, kao i prekršajima u vezi sa uživanjem opojnih droga na javnim mjestima i bahatim ponašanjem pojedinaca ili grupa lica u kasnim noćnim satima.

Stanje bezbjednosti saobraćaja na području Tuzlanskog kantona se u toku 2001. godine stabilizovalo i u mnogim segmentima poboljšalo. Poboljšanje stanja bezbjednosti saobraćaja

rezultat je preventivnog djelovanja policije i prije svega odnosi se na smanjen broj saobraćajnih nezgoda za 4,51%. I pored toga, ipak je došlo do povećanog broja smrtno stradalih lica u saobraćajnim nezgodama.)

U odnosu na 2000. godinu, u oblasti bezbjednosti saobraćaja učinjen je manji broj krivičnih djela za 15,66%, manji broj prekršaja za 23,84%, izrečeno je 13,54% manje mandatnih kazni, vožnja pod dejstvom alkohola bilježi trend smanjenja za 3,05%, učešće vozila u saobraćaju bez važeće registracije smanjen je za 12,25%, zbog tehničke neispravnosti iz saobraćaja isključeno 48,68% manje vozila, broj vozača koji su upravljali vozilom sa izrečenom zaštitnom mjerom manji je za 5,38%, dok upravljanje vozilima bez položenog vozačkog ispita ima trend rasta za 2,95%.

U toku izvještajnog perioda, od strane Ministarstva unutrašnjih poslova TK-a nadležnim tužilaštvima je podnešeno 5,38% više krivičnih prijava nego u prethodnoj godini. Broj učinilaca krivičnih djela je veći za 4,69%, dok je ukupan broj učinjenih krivičnih djela manji za 14,60% u odnosu na prošlu godinu.) Broj krivičnih djela izvršenih od strane nepoznatih učinilaca čini 61,24% od ukupnog broja krivičnih djela. Otkriveni su počinioci 1.043 krivična djela izvršena po nepoznatom izvršiocu, što predstavlja procenat otkrivenosti od 36,23%, dok je procenat otkrivenosti u 2000. godini iznosio 22,61%. Dakle, posebnim angažovanjem službenika MUP-a i pored slabe opremljenosti, procenat otkrivenosti u izvještajnom periodu je povećan za oko 14%.

Stanje kriminaliteta na području MUP-a TK-a, s aspekta pojava, povoljnije je u odnosu na prošlu godinu. Kada su složeniji oblici krivičnih djela u pitanju (ubistva, silovanja, razbojništva, teški slučajevi razbojništva i razbojničke krađe i dr.), može se uočiti smanjenje broja krivičnih djela silovanja i porasta broja krivičnih djela teških slučajeva razbojništva i razbojničke krađe. Zabrinjava pojava raznih oblika razbojništva kojih na ovim prostorima do sada nije bilo, kao što su oružani napadi na banke, benzinske pumpe i drugi.

Aktivnosti MUP-a TK su bile usmjerene na realizaciju Programa borbe protiv korupcije, kojeg je donijela Vlada Tuzlanskog kantona. U okviru navedenog, pažnja je bila fokusirana na sprečavanje i dokumentovanje krivičnih djela koja imaju obilježja korupcije, porezne utaje, prijevare, krivotvorenje isprave, krivotvorenje službene isprave, krivotvorenje novca, utaje, primanje i davanje mita itd.

Najveći broj izvršenih krivičnih djela i dalje se odnosi na oblast imovinskih delikata, a objekti napada su poslovni, stambeni i pomoćni objekti. Iz ove oblasti, evidentan je porast krivičnih djela - sitno djelo krađe, utaje ili prevare za oko 52% u odnosu na 2000. godinu i smanjenje broja krivičnih djela - teška krađa, za oko 6%, koja su specifična u smislu različitosti načina izvršenja, objekata napada i predmeta koji se otuđuju.

Pod sumnjom da se radi o falsifikatima, oduzeto je 275 novčanica, što je u odnosu na prošlu godinu više za 74 novčanice.

Pored aktivnosti koje su rezultirale podnošenjem krivičnih prijava od strane ovog Ministarstva, značajne aktivnosti u toku 2001. godine su realizovane po zahtjevima tužilaštava, kojom prilikom je nadležnim tužilaštvima podnešeno 316 Izvještaja i to: 148 Kantonalnom tužilaštvu i 168 Općinskim tužilaštvima, što je za 133% više nego u prošloj godini. Navedeni podaci ukazuju da su u toku 2001. godine aktivnosti službenika MUP-a TK u ovoj oblasti, u značajnoj mjeri bile usmjeravane od strane nadležnih tužilaštava, a što je i tendencija kroz izmjene ZKP-a.

U posmatranom periodu izvedena je i Operacija "Auto alarm", zajedničkim djelovanjem MUP-a FBiH i MUP-a RS, u kojoj je učestvovala i policija MUP-a TK i tom prilikom je pronađeno i oduzeto 50 otuđenih putničkih motornih vozila, za što je dobijena i pohvala od Vijeća sigurnosti UN-a. Zajedničkim aktivnostima MUP-a TK u sjedištu i policijskih uprava, presječeno je pet organizovanih lanaca otuđivanja i preprodaje pmv, kojom prilikom su dokumentovana 102 krivična djela otuđenja pmv.

Nešto izraženija problematika u posljednje vrijeme je krivotvorenje viza za zemlje Zapadne Evrope a nije rijetka pojava i krivotvorenih ličnih dokumenata: lične karte, putne isprave, izvodi iz matične knjige rođenih, kao i razne punomoći.

Trgovina ljudima, prostitucija i narkomanija imaju trend zabrinjavajućeg rasta na području Tuzlanskog kantona. U toku 2001. godine, izvršena je kontrola 33 noćna bara kojom prilikom je privedena 201 djevojka zbog osnovane sumnje da su se bavile prostitucijom. Podnešene su krivične prijave protiv 22 državljana BiH za počinjenih 17 krivičnih djela po čl.229. KZ FBiH - posredovanje u vršenju prostitucije, dok su protiv šestorice podneseni zahtjevi za pokretanje prekršajnog postupka po istom osnovu.

Pored značajno preduzetih preventivnih mjera od strane MUP-a TK na planu borbe protiv narkomanije, opšte stanje po pitanju suzbijanja i sprečavanja zloupotreba opojnih droga na području koje pokriva ovo Ministarstvo je nezadovoljavajuće. Ilegalna trgovina opojnim drogama i broj lica koja se time bave, kao i broj uživalaca istih, iz dana u dan se povećava a problematika usložnjava. Ministarstvo je u toku izvještajnog perioda podnijelo krivične prijave protiv 20 lica po čl.252. - neovlaštena proizvodnja i stavljanje u promet opojnih droga, od kojih su 2 maloljetnika i 4 povratnika u vršenju krivičnih djela. Osim toga, podnešena su i 72 zahtjeva za pokretanje prekršajnog postupka protiv 85 lica, zbog proizvodnje, stavljanja u promet i konzumiranja opojnih sredstava.

U odnosu na ukupan broj prijavljenih lica - učinilaca krivičnih djela, 14,42% su maloljetne osobe, što je neznatno povećanje u odnosu na prethodnu godinu. Međutim, ukupan broj krivičnih djela koje su počinili maloljetnici je veći za 26,13% u odnosu na 2000.godinu.

U toku 2001. godine, na području Tuzlanskog kantona evidentirano je ukupno 57 počinjenih suicida, što je za jedan počinjeni suicid više u odnosu na prošlu godinu. U istom periodu evidentirano je i 27 pokušaja suicida, što je za 15 pokušaja suicida ili 35,71% manje nego u prošloj godini.

U toku izvještajnog perioda na području TK-a registrovano je 22,93% manje požara i 48,65% manje eksplozija nego u prošloj godini.) U odnosu na prošlu godinu može se konstatovati da je broj smrtno stradalih lica smanjen je za 1; broj lica sa teškim tjelesnim povredama smanjen je za 9 i broj lica sa lakšim tjelesnim povredama smanjen je za 11.

U okviru normativne djelatnosti, Ministarstvo je pripremio i dostavilo na dalju proceduru Skupštini i Vladi Tuzlanskog kantona Prijedlog Zakona o javnom redu i miru, Prijedlog Zakona o zaštiti od požara i Prijedlog Zakona o vatrogastvu. U toku izvještajnog perioda, radilo se na pripremi nacrtu Zakona o izmjenama i dopunama Zakona o unutrašnjim poslovima TK-a i Nacrta Zakona o nabavljanju, držanju i nošenju oružja i municije, koji su završnoj fazi. Takođe je pripremljen i od strane Vlade TK usvojen Pravilnik o unutrašnjoj organizaciji Ministarstva unutrašnjih poslova Tuzlanskog kantona.

U oblasti analitičko-informativne djelatnosti, Ministarstvo je pripremio i dostavilo na razmatranje i usvajanje Vladi i Skupštini Tuzlanskog kantona sve materijale (programe, izvještaje, informacije i sl.) u skladu sa Programom rada Skupštine i Vlade Tuzlanskog kantona za 2001. godinu.

Održavanjem redovnih i vanrednih konferencija za štampu i saopštenjima za javnost putem medija, Ministarstvo je građanima omogućilo uvid u rad i preduzete aktivnosti ovog Ministarstva, sa posebnim akcentom na oblasti od interesa za građane i aktuelne bezbjednosne događaje.)

U okviru akcije "Vaša policija služi vama" realizovana su i dva projekta: "Otvorena kuća" i "Vaša sugestija i primjedbe, korektiv u našem radu". U okviru drugog projekta održano je 106 skupova sa građanima po mjesnim područjima, uz prisustvo 2.391 građana, dok je istovremeno izvršena i edukacija 22.862 učenika osnovnih škola iz oblasti bezbjednosti saobraćaja i dijelom iz oblasti narkomanije.

U izvještajnom periodu ovom Ministarstvu je dostavljeno 176 predstavki, od kojih se najveći broj odnosi na neprofesionalan rad službenika, odnosno zloupotrebe i prekoračenja službenih ovlaštenja. Od ukupnog broja zaprimljenih predstavki, u 138 slučajeva provedena je istraga, kojom prilikom je utvrđeno da je 81 predstavka bila "neosnovana", u 34 slučaja potvrđena je "osnovanost" predstavki, u 20 slučajeva istraga je pokazala da nema dovoljno podataka da bi se žalba protiv službenika potvrdila ili odbacila, te su iste proglašene kao "neriješene", 3 predstavke su povučene od strane njenog podnosioca tako da dalja istraga nije ni vođena. Zbog stvarne nadležnosti 6 predstavki je ustupljeno drugim organizacionim jedinicama, a u 3

slučaja policijski službenici su oslobođeni od optužbe, dok je 9 predstavki, zbog nemogućnosti utvrđivanja svih relevantnih činjenica tokom istrage, pohranjeno kao operativni podatak. U radu se nalaze još 22 predmeta.

Saradnja sa sudovima za prekršaje je kontinuirana i intenzivna. Prema podacima sa kojima raspolaže ovo Ministarstvo, sudovi za prekršaje su riješili oko 65% zahtjeva za pokretanje prekršajnog postupka podnešenih od strane organizacionih jedinica MUP-a TK u 2001. godini.

U toku 2002. godine, u cilju poboljšanja stanja u resoru unutrašnjih poslova, pored intenziviranja aktivnosti po svim segmentima rada, planiraju se izvršiti izmjene Zakona o unutrašnjim poslovima TK-a i izmjene Pravilnika o unutrašnjoj organizaciji i sistematizaciji i s tim u skladu, unapređenje organizacije rada, sistema rukovođenja i koordinacije. Preduzeće se aktivnosti na angažovanju neophodno potrebnog broja visokoobrazovanih stručnih kadrova te stručno usavršavanje svih službenika policije. Značajna pažnja će se posvetiti unapređenju saradnje sa svim relevantnim subjektima po pitanjima iz djelokruga Ministarstva.

Imajući u vidu navedene pokazatelje aktivnosti Ministarstva unutrašnjih poslova Tuzlanskog kantona, a uzimajući u obzir ograničavajuće faktore u radu, kao što su: loše stanje materijalne i tehničke opremljenosti te prisutne kadrovske probleme, može se konstatovati da je ovo Ministarstvo odgovorilo postavljenim zadacima i realizovalo Program rada za 2001. godinu. Rezultati u realizaciji Programa rada MUP-a TK za 2001. godinu pokazuju određeno poboljšanje stanja bezbjednosti po pojedinim oblastima, a što je prvenstveno rezultat maksimalnog angažovanja pripadnika MUP-a na intenzivnom preduzimanju preventivnih mjera, posebno na pokrivanju terena, neposrednim kontaktima sa građanima i edukacijom.

Navedene poslove i zadatke iz djelokruga Ministarstva u 2001. godini obavljalo je ukupno 1.997 službenika i namještenika, od čega 1.601 ovlašteni službenik uniformisane i kriminalističke policije i 396 neovlaštenih službenika i namještenika. Za realizaciju Programom definisanih poslova i zadataka ovog Ministarstva, Budžetom Kantona za 2001. godinu predviđena su finansijska sredstva u iznosu 28.642.400,00 KM, od čega je realizovano 22.549.732,47 KM (oko 79% planiranih sredstava), što ukazuje na veoma teške materijalne uslove u kojima Ministarstvo radi.

MINISTAR
Muhamed Čaušević